

Kolosi

Polo'a Lomu kumate kina nopi maineno Kolosi kumate maine'ya Yisasife havi'ya amakupi malenaya vea'mogamitega mani avona kae-malege'ana Tikikusigani Onesimusigani ali'ana momamina'e. Yisasi'a faliteno hetino ikapinaga haitegeno Polo'a teti'a (30) kafu agava maineno Kolosi kea kae-malene.

¹⁻² Nagaya Polo'nae Anumaya Koti'a agai'a haiya avamete huno Aposolo kanoa hunate-nege'na mainoafe nagai'ene Timoti nenafu'ene Kolosi kumate mainetama Yisasife havitama tamakupi malenaya ne'afugatama mani avona kaeta'a nelamamu'e. Anumaya Koti'a Nelafa kayone hisia yama'aene tamaipa falu hisia yama'aene tamamisie.

*Kolosi kumate anaga'mo'ya tamage hu'ya Yis-
asite amametitia humainae.*

³ Ta'agaya muki'a kanafina Yisasi Kalaisina Nefa'a, Anumaya Kotifena havinegeta tamakaifena tusi'a muse huta'a havinego'e.

⁴⁻⁵ Ta'agaya tamavagea ago havilino'e. Anumaya Koti'a tamagelafa humainea kemo'a, Yisasife kanale mono kea, tamahapaiya kea ago eva'yi higetama Yisasi'a hulatenea yafe havitama tamakupi maletama tamametiti hutama muki'a Yisasife havi'ya amaku'a amitafa humainaya vea'mogamife tamahau tamayamopafi nelamahaiye. Anumaya Koti'a tamamisia yana ikapinaga talo tala

humaleneafe tamametiti nehaya yapiti ani'ama nehaya yamo'a falote hia yafena ta'agaya Anumayamotega tamakaifena muse nehuta'a ke huta'a havinego'e. ⁶ Anima Yisasi'a hulatenea kanale mono kea muki'a kotega kagino ala huno veapina alino kanale au'ava yana ali falote humaineafe tamakaite ea'amo Anumaya Koti kayone hisia yafema havilama haya kanafi aepa heno tamakaipina ani'a huno kanale au'ava yana ali falote humaine. ⁷ Epafalasi'a mani mono kea huhaleno higetama havilinae. Ani kanoa ta'agaila ta'aya huno Yisasi Kalaisi ali'yana alige alige nehia kanogino ta'agai'ene nagopi ali'yana ne'aluna kanogino agaifena aluya huno nenahaiye. ⁸ Alu Aotage Avamu'mo'a veafema tamahau tamayamopafi nelahamaiya yana tamaminegetama ani'a kava'ma nehaya yafena Epafalasi'a ago ta'ahapai-mainie.

Polo'a Kolosi veala alino tokiya vaimatesia yafe Anumaya Kotitega havinege.

⁹ Ani yafe hagote kanafina ta'agaya ani kea haviteta'a ani yupa aepa heta'a tamaya huta'a Anumaya Kotitega havigeta'a tamakaifena ta'agela kaniotamateno'e. Mage huta'a havigo'e "Alu Aotage Avamu'mo'a kanale amaku amakesa amamino Anumaya Koti'ma nehaiya au'ava yana hamapaisigeno amakupina hiya hinage'ya havisae. ¹⁰ Hiya hisigetama tamakaya kama vaiyesayana Anumayamo vea'ne fatago hutama maisageno Anumayamo'a muki'a maisaya au'ava yatamihena 'Nagai nafa'nemo'ya amatea kava nehae.' huno haisie. Muki'ama

nehaya kavala kanale yake'ya falote hisigetama Anumaya Koti aepa'a aluya hutama agetetama agaifema havilinaya yatamimo'a ala hisie. ¹¹ Anumayamona tokiya'age hale yama'aleti ali'ya tokiya vaimatesage'ya hetofa vea'ne maine'ya muki'a kana yama falote hisigeno'a amaku'amo'a atali talua ohinage'ya tokiya'age vea'ne ako hu'ya amaipa muse yapi maisae. ¹² Tokiya'age hale yapi mainaya vea'nene hetita maisuna tokiya taminageta tatesia kava huta anifi maisuna yafe Nelafatega tusi'a muse hisune.” huta'a Anumayamotega havinego'e. ¹³ Hagoteno Satani kava hulategeta hani yapi mainonageno Anumaya Koti'a ani yapiti tavaleno agai'a hau ayamopafi nehaiya nafa'nemo kava yagai-mainelega tavaleno latene. ¹⁴ Kefo yatimo aigagilategeta mainonageno Anumaya Koti nafa'nemo'a anifiti kalu he-talesiafe miya hulategeta mainonageno kefo yatia aigetateno atale-latene.

Polo'a Kalaisi au'ava'ene ali'yama'aenefe hu-maine.

¹⁵ Veamo'ya Anumaya Kotina o'agegahe hayanagi agai'a nafa'nea Yisasi'a Nefa'ene nago avamete hu'ana maina'anagino Yisasi'a Anumaya Kotina hagote nafa'ne'agino* maineno muki'a Anumaya Koti'ma talo humalenea yatela ala'ami maine. ¹⁶ Anumaya Koti'a hapaigeno Yisasi'a agai'a muki'a yana talo humalene. Ikapinaga ya'ene mopafi ya'ene ne'agona ya'ene no'agona ya'ene ensole vaya'ene Satani Avamu'ene ala kava vaya'enena agai'a agima

alisaga hisaya yafe Yisasi'a talo humalene. ¹⁷ Yisasi'a hagoteno mainegeni muki'a yamo'a agai'a humainea keleti no'amile no'amile maime ute ete hu'ya mailama humainae. ¹⁸ Yisasi'a agaife havi'ya amakupi malenaya vea'mogami amakenopa maineno kava yagaimatene. Yisasi'a agaife havi'ya amakupi malenaya vea'mogami aepa'a maineno muki'a yamona kava yagaimateno ala kano'ami maisiafe uhagotemateno fali-mainefitila eteno hetimaine. ¹⁹ Anumaya Koti'a haigeno agai'aene muki'a tokiya'aene kanale au'ava yama'aene nafa'ne'amopi maleno hiya humalene. ²⁰ Na'a hu-mainae Yisasi'a yafaga yosale'ma faligeno lavi-mainea kolateti Anumaya Koti'a muki'a yama'a ma mopafi ya'ene ikapinaga ya'ene aigetateni falu hulateno "Nagoke taipale maisune." huno humaine.

²¹ Nayona tamaku tamakesamo'a kame hutesaya kava higetama kefo yana maitama nehutama Anumaya Koti'enena kame hutena. ²² Hutayanagi Yisasi'a Nefatega tamavalesigetama kefo yatamia omalesigetama alu aotage vea'a maisaya yafe'ene nagoke vea'mo'ya "Kefo ya nehae." hu'ya ohisaya yafe'ene Yisasi'a augafa agata aigeno yafaga yosale fali-maine. Fali-mainea yateti ago aigetamateno falu hu-nelamateno nagoke taipale alino lamatene. ²³ Lamatenegi tamakaya Yisasi'ma hulamatenea mono kema havitama tamakupi malenaya yana atafa hutama tokiya vaiho. Havigu nago yamo tamavayu hisigetama Yisasi'ma hulamatenea kanale mono

kema havilinetama tamametiti nehaya yana ataleyafenagi mai lokiya waitama maiho. Ani kanale mono kea tamakaya havitage'ya muki'a mopale vea'mo'ya havilinage'na nagaya Polo'na anima Yisasi hulatenea kanale mono kemo ali'ya kano maine'na mani kea hamane'paue.

Polo'a Kolosi vea'ne amaya humaine.

²⁴ Tamakai tamaya hisuafe naugafa nagata aiya nopima mainoa yafena aluya hu'na musena nehue. Kalaisi augafamo'ma tusi'a agata aimainea avamete hu'na nagaya naugafa nagatama aiya yateti Yisasife havi'ya amakupi malenaya veala agai'a augafa maige'na Yisasina agatama aimainea yana alivaya nehue. ²⁵ Anumaya Koti'a "Yisasina amaku'a aminaya vea'nea amaya huo." huno hunateneanagi'na muki'a Anumaya Koti kea huhale'na tamahapaisugetama havilama hisayafene huno hunatene. ²⁶ Hunatenegeno Anumaya Koti kea nayona falakino hanege'ya muki'a veala hamaopainagi menia ago fufute eva'yi hige'ya muki'a Yisasina amaku'a aminaya vea'mo'ya nehaviye. ²⁷ Nehaviyanagino Anumaya Koti'a agai'a haiya kava huno Yuta vea omainaya vea'mogami amu'nopi anima falaki-mainea kea, tusi'a kanale kea, taveligeta anima falaki-mainea kea mage hu'ya hageta havimainone "Yisasi Kalaisi'a tagupi maineanagita tagaya haenaga'a agai'a tokiya'age hale yama'aene kumatela umaigahune." hu'ya hageta haviteta tametititia nehune. ²⁸ Tagaya nagoke nagoke'mogami Kalaisifena huhaleta

hamanepaita tamavaleta Anumaya Koti aule'ma tamatesunana Kalaisi'ene aiga'mae'ya tokiya'age mono vea'ne maisae huta kanale tagu tagesaleti huge tamaveligea nehuta muki'a veafena “Ka'yetama maiho.” huta nehune.
²⁹ Nehugeno Kalaisi'a muki'a tokiya'ama nagupi naminea tokiyaleti nagaya tusi'a kasageke yapiti himamu hu'na ali'yana ne'alue.

2

Tokiya'age tametiti nehuta havigea nehaya kea atalesune.

¹ Tamakai'ene Leotisia mainaya vea'nene muki'a nagai naufima onagenaya vea'nene tamaya hisua yafe nagaya kasageke hu'na ali'yana ne'aluanagitama havisae hu'na avona negaove. ²⁻³ Tamaku'amona ali lokiya vailamatesigetama nelamafu'ene nago tamaku tamakesa havitama tamahau tamayamopafi tama-haisigetama Anumaya Kotina falaki-mainea ke'amo aepa Yisasi Kalaisi'a agai'a muki'a kanale agu agesa nehavia ya'ene Anumaya Koti agesafi hanea ya'ene havilama hisageno tamakupina hiya hisia yafe tusiya huno nenahaiye.

⁴ Havigu nago'a vea'mo'ya tamaipa ayesaya ke hu'ya havige ayelamavataga hisaya yafe mani kea nehue. ⁵ Tamakai'enena tokae'na omainoanagi nagu nagesamo'a tamakai'ene maineanagitama tamakaya Kalaisi'a hulatenea mono kema havitama tamakupi maletama tamametiti hutetama tokiya vaitama nagopima

hetitama fatago hutama maiya yafe havite'na tusi'a muse nehue.

Yisasi'ene ailokaeta maineta haegafa lahaim-ula alisune.

⁶ Tamakaya “Yisasi Kalaisi'a tagaite kava yagai-latesie.” hutama ago avale-mainayafe kava hutama agai'ene ailokaetama vaiyeho.

⁷ Yisasi'ma hulatenea mono kema huhale'ya hagetama havitama tamakupi malenaya kea atafa hutama yosa hafu'yamo'ma mopafi taviteno ita'amo'ma atafa huno hageno ala hume hume anale'ma haiya avamete hutama Yisasi Kalaisi'ene ailokaetama fatago hutama ala hutama muki'a kanafina Anumaya Kotifena muse hiho.

⁸ Havigu nago'a vea'mo'ya afa kema, yasimo alino esia kema, nehu'ya havige ayelamavataga nehu'ya tamavayu hu'ya havi kapi tamatesagi tamakaya ka'ye ho. Na'a augafa vea'mo'ya taginagomogami kava'ene ma mopafi havigu kene ali'ya nehagi Yisasi Kalaisifena nohae. ⁹ Nohagi muki'a Anumaya Kotina tusi'a lokiya yama'aene kanale au'ava yama'aene Yisasi Kalaisi agupina tusiya huno hiya humaine.

¹⁰ Hiya humaineafe Kalaisi'ene aiga'maetama ani lokiya yama'aene kanale au'ava yama'aene ali-mainageno hiya higetama mainae. Mainageno Kalaisi'a agai'a muki'a kava vaya'ene ensole vaya'ene Satani Avamu'yagaene kava'ami maine. ¹¹ Maineafe Kalaisi'ene hagotetama aiga'maetama mainaya kanafina Yuta vaya'mo'ya amaugafa laga nehaya avamete huno kefo yama nehaya atafa lamaipa

laga huno alitalene. Ani yana vea'mo'ya amayatetila taga ohunagi Kalaisi'a agai'a taga hu-talegeno kefo yamo'a menia yagai otatene. ¹² Yagai otamateneafe tima falelamatea kanala Kalaisi'enenana aiga'maetama maigeno agai'ene komufina hevailamatene. Anumaya Koti'a komufiti'ma Kalaisina ali hetitenea yafena havitama tamakupi malageno Kalaisi'ene fali-mainafitila ago ali hetilamatene. ¹³ Hagotetama age lamaha'ye hutama kefo yama haya yamo tamahaegenon tamaku tamamemo'a fali-maine. Falianagi Anumaya Koti'a tamakaila Yisasi Kalaisi'ene fali-mainafitila ali hetilamateno haegafa tamahaimula tamamiteno muki'a kefo yama haya yana aigetamateno atale-lamatene. ¹⁴ Muki'a nayo kahegi kema akave omalonafe kaiyekea hulatesia kemonana Anumaya Koti'a aye hanane-talene. Ani avomo'a kaiyeke hulatesia yate tatafa hu-linegenon Yisasina yafaga yosale male'ya nili hetafa hu-malenaya yateti ani kemo akavela nomalonafe anona'a ali ha'no hu-talene. ¹⁵ Ali ha'no hu-taleneafe Anumaya Koti'a Yisasi'ma yafaga yosale fali-mainea yateti muki'a Satani Avamu'yagaene kava'amiene tokiya'amia amakaseno alihaviya hu-taleteno muki'a vea'mogami amaulagafi Satani ya'yaga “Tokiya'amia omalene.” huno amaveli-maine.

Yisasi'ene ago fali-mainonafe nago'a kahegi kea taya ohugahie.

¹⁶ Havigu nago'a vea'mo'ya nesaya kavefe'ene tife'ene opa kanaene sapatu kanaene maifalu hisaya kanaenefena “Na'a higetama ma kavala

nehae.” hu'ya kaiyekea hu otamatesae.
¹⁷ Ani kava'yaga augafa'a omalenea ya'yaga amema'amo hia avamete hu'ya haenagama falote hisia kanamofe tave-neligi Yisasi Kalaisi'a tama yatafana agai'age maine. ¹⁸ Nago'a vea'mo'ya himonama agaya yafena atafa amaipafiti tusiya hu'ya amaugafa ali'ya haite'ya mage nehae “Taugafa alita nohauna vea'ne mainone.” hu'ya amega amaugafafiti hute'ya “Ensole vaya'mogami amakia alisaga hiho. Alisaga ohisayana Anumaya Koti nafa'nea omainae.” hu'ya nehaya yafe havigu amakai kema havisage'ya fako hu'ya kanale anonatamia tamaha-falesagi ka'ye ho. ¹⁹ Ani vaya'mo'ya Kalaisi'enenana aiga'mae'ya omainae. Tamage Kalaisi'a tagai kava yagailatesia tagenopa maigeta augafa'a mainone. Ani tagenopamo'a muki'a augafafina tale'ya taganunaene nuna amigeno ayega'maesia ya'ene amigeno Anumaya Koti tokiyaleti ani augafamo'a ko nehie.

²⁰ Tamakaya Kalaisi'ene ago falitetama kefo yatamia ataletama muki'a ma mopafi tamakinagomogami kefo yana ago atalena. Na'a hige-tama Yisasi kea nohaviya vea'mo'ya vaine'ayaya kava hutama vaine'ayae? Na'a higetama mani vaya'mo kahegi kea akave nemalae? ²¹ Mage hu'ya nehae “Ma yatela atafa ohiho. Ma yana oneho. Ma yatela ame'amela ohiho.” hu'ya nehae. ²² Ani kema nehaya ya'yagamo'a nesunageno fanane hugahie. Amakai'ami amaku amakesafiti mani kahegi kea tamahanepaiye. ²³ Nehage'ya tamage ani kahegi kea kanale

havi havi'ya nehaya vaya'mogami kea kana nehagi amegale kea mage hae “Tagaitige Anumaya Koti agia alisaga nehuna ya'ene laugafa alita ohaisuna ya'ene laugafa aiko neluna kava'ene taha'nemae.” hu'ya hagi ani nehaya kavala tau-gafa age taha'ye hisia yana atalesuna yafe taya ohugahie.

3

Tagaya Kalaisi'ene ago eteta heti-mainone.

¹ Anumaya Koti'a Kalaisi'ene tamakaila ago alino hetilamateno haegafa tamahaimula ago tamamine. Tamamineafe tamakaya anafinagati alisaya yafe tamakesa havi havi hutama maiho. Anafinaga Yisasi'a Anumaya Kotina tamaga ayatega hanea siale maine. ² Maineafe muki'a kanafina tamakaya anafinaga yafeke'ya tamakesa havi havi hutama mainetama ma mopafi yafena tamakesa ohaviho. ³ Tamakaya kefo yama nehaya atafa tamaipa ago falitegeno kanale'ya hutama maisaya yatamia ago falakino Kalaisi'ene aiga'mae-maineanagino Anumaya Kotipi hane. ⁴ Hanegeni Kalaisi'a tamahaimu'mo aepa'a fufute'ma eva'yi hisigetama tamakai'ene tokiya hale yama'afi umaigahae.

Nayona yana ago ataleta menia haegafa vea'ne mainone.

⁵ Tokiya'age hale yama'afi umaisaya yafe ma mopafi kefo yama nehaya ya'yaga hamaetama ha'no hiho. Ma'a au'avafe nehue muna'nene a'nene kumai he yane. Tamaugafamo'a oni'ya'age nehia kefo yane. Augafa haga

neyane. Age lamaha'ye nehaya yane. Alu kanomo yate age lamaha'ye nehaya yamo'a ago fali-mainaya vea'mogamife “Anumayati maine.” hu'ya amakisana vai'ya amaku amisaya avamete huno Anumaya Kotina amaku o'aminaya avamete kava nehie. ⁶ Muki'a ani kava'ma nehaya vea'mogamina Anumaya Koti'a aipamo'a haviya nehianagino haivaimateno anona'amia amakata aisia yana amamigahie. ⁷⁻⁸ Hagotetama tamakai'enena ani vea'nene vaiyatete nehutama ani kavala hu-mainagi menia muki'a ani kavala ataleho. Kema vaiyane. Tamaipafiti anumayayamo hai yane. Vaya havita haviya humatesaya yane. Vea'mogamife kamuge hatagetama vaimate yane. Age lamaha'ye nehaya yamo avagemama nehaya kea ataleho. ⁹ Tamakaya atafa kenama asagitama haga'yu hutalaya avamete hutama atafa lamaipaene humainaya ya'enena ago atalenagi nelamafugamifena havigema ayemavataga nehaya kea ataleho. ¹⁰ Tamakaya yaufa kenama alitama nefaiya avamete hutama haegafa tamaku tamakesale ago mainageno Anumaya Koti'a muki'a kanafina agai'a au'ava yana tamaveligetama havitetama ani haegafa lamaku tamakesamo'a nago'ene haegafa vea'ne kana hutama Anumaya Koti mainea avamete hutama mainetama Anumaya Kotifena havilama hugahae. ¹¹ Ani haegafa vayala mainetama muki'a veala nagoke avamete mainone Yuta vea'nene Yuta vea omainaya vea'nene, amaugafa laga hu-malenaya vaya'ene taga ohunaya

vaya'ene haesa vea'nene anupa vea'nene nofipi ali'ya ne'aliya vea'nene afa'a maine'ya miya ne'aliya vea'nene nago avamete mainageno Kalaisi'a agai'a hagote kano'amia kasago'ya vea'mogami amakupina maine.

Vea'mogamife aluya huno lahaisia au'ava yana alisune.

¹² Tamakaila Anumaya Koti'a hapali-lamatenea veala agaila alu aotage vea'ne'a mainageno tamakaifena hau ayamopafi nehaiya vea'ne mainaya yafe kenama alitama nefaiya avamete hutama ma'a kanale kavala failiho. Muki'a veafe tamahau humatetama kayone humateho. Tamaugafa alitama ohaiho. Alu kanomo kema havisayana ako hutama kea o'amakiho. Tamamena mailava hutama maiho. ¹³ Tamakai amu'nopima mainesia kanomo'a nefufena havigema hutesigenofena amena malelava huno maineno aige'ateno kefo yama'a ataletesie. Anumayatimo'a kefo yatamia ago aigetamateno atalelamateneafe tamakaya ani'a hutama ani kavake'ya hiho. ¹⁴ Tamahau tamayamopafima nelamahaiya yamo'a muki'a mani kanale kava'mona agaseno ala humaine. Kenatimona atafa hisia tamu'nofi'ma kitama atalakoma huna avamete huno tahau tayamopafima nelahaiya yana ani'a huno muki'a mani kanale kavala ha'yagino hetofa huligahie. ¹⁵ Kalaisi'a tamaipa falu hisia yana tamamineanagino kava hulamatesigetama ke'a haviho. Nagoke tamaipale maisaya yafe Anumaya Koti'a tamakaifena ke higetama ageno “Nagai naugafa nagoke mainae.” huno humaine. Muki'a yafena

muki'a kanafina Anumaya Kotitega muse huteho. ¹⁶ Kalaisi humainea kea tusi'a kanale kegi tamaku'afina tokiya'age huno haneno. Mani kea nelamafu'ya kefo yama hisagetama kanale havi havi'yatamileti hamapaitama ali fatago humateho. Tamaku'aleti yagamea hutama Anumaya Kotitega musena hutetama yagamefiti Anumaya Koti agia alisaga hiho. ¹⁷ Muki'ama hisaya kava'ene kenema muki'a ani yateti Anumayatimona Yisasi agia alisaga nehutama agai'ama hulatenea yafena Anumaya Kotitega musena hiho.

Polo'a Yisasi kema nehaviya alavene nafa'neyaga'amienefe humaine.

¹⁸ Tamakaya a'nemogatama anautamimogami kea akave maleho. Na'ama hisaya yamo'a Anumayamo aufina fatago kava nehie. ¹⁹ Vemogatama a'netamimo-gamifena tamahau tamayamopafi tamahaisigetama amaipa haviya hisia kea hu o'amateho.

²⁰ Nafa'nemogatama itatami-afotamimogami kea muki'a havitama akave maleho. Na'ama hisaya yafena Anumayamo'a aluya huno nehaiye. ²¹ Nefagatama nafa'netamimo'ya havi'ya amakaye hisifa kea hu o'amateho. Humate-sayana amaipa havi'ya haviya hugahae.

Polo'a ali'ya vea'nene kava'amimofe'ene humaine.

²² Nofipi mainetama miya o'ali ali'ya vea'mogatama* mopale mainaya kava vayatamimogami kea muki'a havitama akave maleho. Havigu "Nagaifena 'Kanale kano maine.'

huno hisie.” hutama kava kanomo auleke'ya ali'yana ne'alitama havigu alulegama visaya kanafina o'alisagi a'ao Anumayamofena koli nehutama tamaku'amo'a fatago hinagetama muki'a kanafina ali'yateke'ya maiho. ²³ Muki'a yama hisaya yana alitama tokiya'age hutama aliho. “Ma mopafi afa vaya'mogami ali'yana no'alunagi Anumayatimo ali'ya ne'alune.” hutama aliho. ²⁴ Tamakaya ago havimainae Anumaya Kalaisi'a tamakaila kava kanotami maineanagino haenaga'a ali'yatamileti anona'a tamamigahie. ²⁵ Tamamigahigi vea'mo'ya kefo yama nehisaya yatetila anona'amia aligahae. Anumayamo'a muki'a vea'mo'ya humainesaya yateti nago avamete huno anona'amia amamigahie.

4

¹ Tamakaya ali'yate kava vaya'mogatama ali'ya vayatamimo-gamina fatago kavake'ya humateho. Tamakaya ago havimainae kava kanotamia ikapinaga nagoke maine.

Nunamu hutama havigetama fatago kate tokiya'age hutama vaiye ho.

² Tamakaya nunamuna atafa hutama tokiya'age hu-linetama tamau kalo-kalola ohutama efi efi hutama tamakesa havitama musena hiho. ³ Kalaisifena nayoma hu falakitenaya mono kea nagaya huhale'na hua yateti nagaila navale'ya kina hunatage'na mainoanagino Anumaya Koti'a kama yakinatesige'na ani kema nago'ene huhale'na hisua yafena nunamuna havigeho.

⁴ Anumayamona haisia avamete kanale'ya hu'na aepa'aene huhale'na hisuge'ya havisaya yafe Anumayamotega ke hutama havigeho.

⁵ Tamakaya kanale havi havi'ya'amima hanea vea kana hutama Yisasi kema nohavisaya veapima mainutama fatago hutama mainetama afa'a omaitama Yisasi kea hamapaiho.

⁶ Hamapaisaya kemo'a muki'a kanafina hagage'ya hamaisifa kege'ya nehutama muki'a veapima kenona'amima hugahena kanale kege'ya hutama hamapaisae.

Polo'a Tikikusigani Onesimusigania hunatege'ana Kolosi umaina'e.

⁷ Tikikusi'a nagaya muki'a navagea tamahapaigahie. Ani kanoa nagaila nenahaiya nenafu'e, Anumayamo ali'yatela efi efi huno kanale ali'ya kanogita tokaeta'a ali'yana ne'alu'ane. ⁸ Tamakaya tagayama nemauna tavagea tamaha-painagetama havitama muse hisageno tamaipamo'a kanale hisiafene hu'na hutogeno tamakaitega umaine. ⁹ Onesimusina agai'ene Tikikusiganina hunatesuge'ana uga'e. Onesimusi'a efi efi huno kanale ali'ya alino maigeno nenahaiya nenafu'a, tamakai kumateti kanogino male'ma folote humainea yamo kea tamahapaiga'e.

Polo'a Kolosi mainaya veafe huno falu fala humatene.

¹⁰⁻¹¹ Alisatakusi'a nagai'ene nofipi mainea ka-noene Maki'a Panapasina aku'amo'ene Yisasi'a nago agia Yasatusi'ene hu'ya falu fala hulamatae. Ani vaya'mo'yage Yuta vayapitila nagai'enena

Anumaya Koti'ma kava yagaisia yafena vaiyatete hu'ya hamanepai'ya nagaila aluya hu'ya naya hageno naipamo'a kanale humaineafe Makifena nagaya ago'ma humainoa kele nehavianagitama tamakaite'ma uva'yi hisigetama avaletama ali kayone huteho.

¹² Epafalasi'a tamakai kumate kanogino tamakaila huno falu fala hu nelamate. Ani kanoa Yisasi Kalaisi ali'ya kanogino muki'a kanafina tamaya hisia yafena Anumaya Kotitega mage huno havinege “Anumaya Kotina hau-mainea kavafena havilama hute'ya heti'ya tokiya'age vea'ne fatago hu'ya maisae.” huno havinegeane.

¹³ Havinegeno tamakayaene Leotisia vea'nene Hielapolisi vea'nene tamaya hisia yafena tusiya huno ali'yana alige'na agelama hute'na tamakaitela huhale'na nehue. ¹⁴ Luku'a tahau tayamopafi nelahaiya tota kanotiene Temasi'ene hu'ana falu fala hulamata'e.

¹⁵ Leotisia kumate mainaya tafu-tagana-gami'ene Nifaene agai nopi melitalu hu'ya Yisasife havi'ya amakupi malenaya vea'nene hu falu fala humatogi hamapaiho. ¹⁶ Tamakaya mani avoma hapalitama havitetama Leotisia maine'ya Yisasife havi'ya amakupi malenaya veate atalegeno vinage'ya amakai'ene hapali'ya havisage'ya amakai'ma amaminoa avona tamakaila tamamisagetama hapalitama haviho. ¹⁷ Tamakaya Akipusina mage hutama hapaiho “Anumayamo'ma kaminea ali'yana kava yagaika tokiya'age huka muki'a alio.” hutama hapaiho.

¹⁸ Mani kea nago kanoa hapaugeno kae-maleneanagi nagaya Polo'na nagai'ni'a nayapiti

“Kanale'ya hutama mainao?” hu'na hu falu fala hulamate ke'nia negaove. Nagaya nofipi mainogi tamakesa havitama namiho. Anumaya Koti'a kayone hisia yama'amo'a tamakai'ene hanesie.

Ke'nia male ha'no hie.

Nagai'ni nagia Polo'nae.

**Anumayamo'a Haegafa Alino
Hagelafilatenea Kea
The New Testament in the Kanite Language of Papua
New Guinea
Nupela Testamen long tokples Kanite long Niugini**

copyright © 2002 Wycliffe Bible Translators, Inc.

Language: Kanite

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-04-21

PDF generated using Haiola and XeLaTeX on 11 Nov 2022 from source files dated 30 Nov 2021

55807fd5-1005-5405-89da-5533a7950c65